

Garis Panduan Permohonan Lesen Import (AP) Kenderaan Persendirian bagi Warganegara Malaysia yang Bekerja/Belajar di Luar Negara Bagi Kenderaan yang Didaftarkan Sebelum 1 Januari 2017.

A. DASAR SEMASA AP PERSENDIRIAN

Dasar semasa menetapkan bahawa AP Persendirian boleh dipertimbangkan kepada rakyat Malaysia yang bekerja/belajar di luar negara sepenuh masa bagi membantu mereka membawa pulang kenderaan milik sendiri yang digunakan semasa berada di luar negara (*personal effect*) sahaja.

AP Persendirian bukan merupakan satu insentif/hak bagi semua rakyat Malaysia yang berada di luar negara , sebaliknya dasar semasa menetapkan bahawa AP Persendirian hanya layak diberikan kepada

- i. rakyat Malaysia yang belajar (sekurang-kurangnya peringkat Diploma) atau bekerja di luar negara sepenuh masa (kecuali Singapura, Brunei dan Thailand);
- ii. pegawai Kerajaan yang belajar (kecuali Singapura, Brunei dan Thailand) atau bekerja di luar negara;
- iii. pasangan yang menemani rakyat Malaysia belajar/bekerja di luar negara (kecuali Singapura, Brunei dan Thailand; dan
- iv. pasangan atau anak kepada pegawai dan kakitangan home-based yang berkhidmat di Pejabat-pejabat Perwakilan Malaysia di luar negara.

B. SYARAT-SYARAT KELULUSAN AP PERSENDIRIAN

Kelulusan kepada pemohon yang berkelayakan adalah tertakluk kepada pematuhan syarat-syarat berikut:

- i. pemohon hendaklah berada di luar negara secara sah bagi tempoh tidak kurang 1 tahun;
- ii. kenderaan hendaklah didaftarkan atas nama pemohon di negara pemohon belajar/bekerja bagi tempoh tidak kurang dari 9 bulan (dari tarikh pendaftaran kenderaan sehingga tarikh pemohon pulang ke Malaysia);

- iii. kenderaan hendaklah mempunyai perlindungan insurans atas nama pemohon di negara pemohon belajar/bekerja bagi tempoh tidak kurang dari 9 bulan (dari tarikh sah laku insurans kenderaan sehingga tarikh pemohon pulang ke Malaysia);
- iv. mempunyai lesen memandu yang sah dari segi undang-undang di negara pemohon belajar/bekerja sepanjang tempoh milikan kenderaan tersebut (lesen memandu percubaan tidak boleh digunakan);
- v. kembali ke Malaysia secara tetap setelah tamat tempoh bekerja atau belajar di luar negara; dan
- vi. permohonan dikemukakan dalam tempoh 3 bulan setelah kembali ke Malaysia secara tetap.

C. DOKUMEN-DOKUMEN PERMOHONAN AP PERSENDIRIAN

Bagi mengesahkan pematuhan syarat-syarat kelulusan AP Persendirian yang ditetapkan, pemohon diminta supaya mengemukakan dokumen-dokumen seperti di Senarai Semak Dokumen Permohonan Lesen Import Kenderaan Persendirian (Bekerja/Belajar).

D. PERMOHONAN AP PERSENDIRIAN

Permohonan AP Persendirian hanya boleh dikemukakan terus oleh pemohon sendiri kepada mana-mana pejabat Kementerian ini. Ini kerana kebanyakan masalah berkaitan permohonan AP Persendirian terutamanya yang melibatkan pemalsuan dokumen/maklumat timbul apabila permohonan dilakukan oleh ejen.

Ingin juga diingatkan bahawa pemalsuan dokumen/maklumat kepada mana-mana badan Kerajaan adalah satu perbuatan yang serius dan menyalahi undang-undang. MITI berhak untuk menolak/membatalkan kelulusan sekiranya terdapat pemalsuan dokumen/maklumat dalam permohonan yang dikemukakan. Pesalah laku boleh disenarai hitam dan dikenakan tindakan undang-undang atas perbuatan tersebut.